

NO. SOALAN: 71

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN MOHAMED HANIPA BIN
MAIDIN [SEPANG]**

TARIKH : 25 JULAI 2017

RUJUKAN : 9955

SOALAN:

**Tuan Mohamed Hanipa Bin Maidin [Sepang] minta MENTERI
DALAM NEGERI menyatakan mengapakah tiada sebarang tindakan
diambil ke atas Ketua Polis Negara yang mengakui beliau dan
keluarga beliau ada berhubung dengan penjenayah yang ditangkap
di Melaka oleh SPRM.**

JAWAPAN:

Tuan Yang di-Pertua,

Untuk makluman Ahli Yang Berhormat, Kementerian tidak bercadang untuk mengulas lebih lanjut berkaitan perkara ini memandangkan kes berkenaan masih dalam siasatan pihak Suruhanjaya Pencegahan Rasuah Malaysia (SPRM) dan terserah atas budi bicara pihak SPRM sama ada untuk memanggil Ketua Polis Negara memberikan keterangan atau sebaliknya.

NO. SOALAN : 72

PEMBERITAHUAN PERTANYAAN DEWAN RAKYAT

PERTANYAAN: LISAN

**DARIPADA : YB TUAN HAJI AHMAD LAI BIN
BUJANG**

TARIKH : 25 JULAI 2017 (SELASA)

SOALAN : 72

YB Tuan Haji Ahmad Lai Bin Bujang [Sibuti] minta PERDANA MENTERI menyatakan apakah langkah Kerajaan untuk mengawal perairan Laut China Selatan di Sarawak dari pencerobohan nelayan asing dan berapa banyak tangkapan bot nelayan asing sejak Januari 2017 hingga sekarang bagi negeri Sarawak sahaja.

JAWAPAN: YB. DATO' SERI DR. SHAHIDAN BIN KASSIM
MENTERI DI JABATAN PERDANA MENTERI

Tuan Yang Di-Pertua,

Malaysia Coast Guard (Maritim Malaysia) amat memandang serius masalah pencerobohan nelayan asing di kawasan perairan Negara khususnya negeri Sarawak. Oleh yang demikian, terdapat beberapa inisiatif yang telah dilaksanakan oleh Agensi bagi memastikan semua aset dapat beroperasi sepanjang masa seperti berikut:

- a) Pada masa kini *Malaysia Coast Guard* (MCG) telah meningkatkan rondaan dan kehadiran dengan mengoperasikan 6 buah vesel setiap hari bagi Wilayah Maritim Sarawak sebagai langkah untuk mengawal isu pencerobohan bot nelayan asing disamping mengekalkan 70% kesiapsiagaan aset sedia beroperasi pada setiap masa;
- b) *Malaysia Coast Guard* juga menjalankan kerjasama dengan Jabatan Perikanan Negeri Sarawak bagi menangani kegiatan mencuri hasil tangkapan laut milik negara. Justeru, isu berkaitan pencerobohan bot nelayan asing di laut dapat ditangani dengan lebih berkesan berdasarkan maklumat yang terkini dan tepat;
- c) *Malaysia Coast Guard* juga telah menerima sebuah kapal kelas OPV (*Offshore Patrol Vessel* - Kapal Peronda Luar Pantai) daripada kerajaan Jepun iaitu KM ARAU yang mana telah ditempatkan di Jeti Kota Kinabalu, Sabah. Penerimaan kapal ini membolehkan *Malaysia Coast Guard* menzahirkan kehadiran di laut dalam satu jangka masa yang panjang dan mengoptimumkan pengoperasian di perairan Laut China Selatan khususnya perairan Sarawak bagi mengawal kegiatan pencerobohan bot nelayan asing;

- d) Selain itu, pengawasan melalui udara juga terus dilaksanakan bagi mengesan pencerobohan bot nelayan asing yang memasuki perairan negara dari semasa ke semasa; dan
- e) *Malaysia Coast Guard* juga menyahut seruan kerajaan dengan melaksanakan Strategi Lautan Biru Kebangsaan (NBOS) bersama-sama agensi-agensi Kerajaan yang lain seperti TLDM, PDRM, Kastam, Jabatan Laut, Jabatan Perhutanan, Kementerian Pelancongan dan Kebudayaan, Jabatan Taman laut, dan Petronas bagi meningkatkan keberkesanan keselamatan di perairan Sarawak.

Berdasarkan inisiatif-inisiatif yang telah dilaksanakan sebanyak 14 tangkapan bot nelayan asing di perairan Sarawak sehingga 30 Jun 2017 dengan perincian seperti jadual berikut:

| SIRI | BOT (NEGARA) | JAN | FEB | MAC | APR | MEI | JUN | JUMLAH |
|------|-----------------|-----|-----|-----|-----|-----|-----|--------|
| 1 | VIETNAM | 2 | 0 | 0 | 0 | 8 | 4 | 14 |

Sekian, terima kasih.